

四庫全書

集部

欽定四庫全書

集部

石門文字禪卷

二十九
三十

詳校官庶吉士臣汪彥博

侍讀臣孫球覆勘

覆校官庶吉士臣毛鳳儀

校對官主簿臣郭祚熾

謄錄監生臣劉紳

欽定四庫全書

石門文字禪卷二十九

宋 釋覺範 撰

書

上張無盡居士退崇寧書

某啟誦相公佳句願見二十年矣每念威德崇重辯才
無礙未易酬對顧省鈍根無異能解非所堪任以是久
不敢行詣耳不謂比來照禪師書中過辱緒言見及如
佩黃金良藥之賜閣下昔與雲庵兜率神交道契爲內

外護雖當時從游之人如某者亦蒙記錄愛人而及屋
烏謂徒虛語今始信然又蒙辱以崇寧見召尚未識門
屏而據授以師位衲子驚怪莫不改觀實以鄙陋恐臨
事失職有累閣下知言耳故不敢輒受謹課成拙頌六
首繕寫呈上聊供閣下千里法喜之游干冒鈞重不勝
愧悚

答張天覺退傳慶書

某啟某青山白雲之人其蹤跡不願上王公貴人之齒

牙縱浪大化飽飯足矣不虞閣下過顧千里惠書以崇
寧見要挽至人天之上使授佛之職責以重振西祖已
墜之風其以閣下所責甚重某之材力甚薄不敢輒冒
寵命作偈辭免意閣下必憐其誠從其所欲棄置之久
矣而禮意益勤三返其使欲一相見而已某翻然改曰
無盡居士道大德博名聲徧華夏獨立四顧爲我家門
牆又先雲庵之執今區區於一愚比丘其可終不往也
故間闕而來閣下一見過有稱賞嘗謂天下之英物聖

宋之異人撥置形骸傾瀉意氣竒章

闕

代雲蓋賀北禪方老書

清淨燕居雖聖師之明誨流通法藏乃釋子之本心于其可爲之時蓋亦何膠於迹遠公老矣竟不過於虎谿南陽翻然乃肯來於鳳闕觀其以道自重則或異惟其以身徇法則皆然伏惟某人清明在躬淳化接物以淵才雅思之三昧資淹通博識之兼能比自雲山徙居城中蓋叢林之故老傳聲名於此邦金斗城中舊挽浮山

之九帶汨羅江上重揚臨濟之三玄光壯吾宗提攜後
學凡於聞見無不懽譁屬叨疾衰尚稽展對謹奉啟陳
賀春色向暄尤冀珍重

代答瀉山評老書

竊承已辭惠日咸爭瑞鳥之先瞻歛然道風遽與珍緘
而竝至悃誠特厚文彩甚華俯思衰殘交增喜愧顧茲
瀉水寔甲熊湘前豪峻大雄之風近世茂霜華之嗣欽
承禪師遊戲法窟熟爛叢林飄然而來故將有意於先

覺發其所蘊行看施益於後昆豈惟拙者之與榮抑亦
輿情之所望謹奉啟上謝

代法嗣書

某聞惟師弟子系時因緣雖遷流於人天或契闊於生
死不謀而合妙於磁石之鍼適然而逢特類盲龜之木
方相視而一笑歎再來之尚存披掌發異世之珠後身
附前生之植載之傳記炳若丹青然望道固有淺深受
材不無大小沿從中世非復古風名存實亡力微習重

寂無奮起幾至陵夷如某者志節願追古先識慮皆居
人下契無悟花之敏迷有摘葉之愚自離七閩謾游三
楚夤緣養育則恩均親教提攜收拾則人固戶知非止
見聞之熏烝蓋亦琢磨之馱飫誓同小朗斷節不下三
生敢料大瀉踢餅遂辭百丈恭惟某人道傳熊嶽派出
虎溪聲華久著於叢林誠寔可開於金石游戲翰墨爛
熟教乘屢讓名山倦臨清衆而宗門道廣學者日親機
比踈山敢犯腹中之鱗甲辯如慧日寧逃口內之雌黃

蓋其要妙淵深高明廣大而某應量而休蚊蚋亦名飲
海登高未已女蘿適幸依松敢不永棄世緣長依淨社
激昂志節報効恩私然力甚纖埃敢助培於佛種光猶
爝火徒僭續於祖燈瞻望門闌馳心師範過此已往未
知所裁

代答書

伏審光膺顯命榮遂素心輿情欣聞士論增氣竊謂仕
宦無大小當各行其志窮達有義命則不必言時較今

竹帛所傳如漢文武之盛觀其至鑒大不可誣相如之
賦甚工止於爲令李廣之藝絕類竟不得侯蓋功名出
於偶然故用舍置諸度外然有是語未見若人恭惟某
官深於文詞綽有標韻言行信於閭里聲稱著於搢紳
袖手來歸餞華顛於詩酒桂冠閒暇登清嘯於雲泉方
慚贊賀之未緣遽辱玉封之先及獲窺筆力槩見平生
習俗移人鄙後來居士之論天資近道有急流勇退之
風陳誼甚高把卷增慨驚文彩之奪目挹謙光之照人

永爲巾笥之珍愧乏瓊瑤之報其於欽佩莫究頌言

代上太師啟

君子立邦家之光固難親炙忠臣在社稷之衛豈易飯
依幸逢濟濟辟王之朝共遇赫赫師尹之貴豈無巨筆
用贊元勳故巨壑縱魚王褒著漢武得賢之頌在垆牡
馬史克陳僖公有道之詩敢當措紳先生作者之前願
聽狂簡小子斐然之語雖牖中窺日未盡光輝然爨下
焦桐亦堪聽采恭惟某官文章宗伯道德真儒會逢千載

一遇之時協贊一日萬機之政股肱周室首居尚父之
尊左右商王自任阿衡之重一持政柄大振朝綱李逢
吉十六子之姦回悉歸竄逐崔祐甫八百員之英傑盡
入搜揚恢雖泮以興賢奠幾千人經明行修之士設庠
序而化邑復數百年鄉舉里選之科鑄鐵錫子母以利
便公私弛山河茶鹽而通行商旅興水利則俶載南畝
得施十千維耦之勤勸農田則平秩西成俱獲三百其
困之望恤貧置院凶年無溝洫之憂漏澤開園枯骨免

狐狸之噉天寧建寺祈明明天子壽考萬年敦宗立官
使振振公子本支百世以至乎九鼎鑄而百神受職八
寶獻而萬福攸同大晟作而足以動天地感鬼神四輔
建而足以利國家興社稷王道平而百川理黃河於是
乎清元氣回而萬物春靈芝於是乎秀遂致一人有慶
四海無虞三階平而風雨時五穀熟而人民育天垂甘
露地產嘉禾山川草木之裕如鳥獸魚鼈之咸若民躋
壽域俗樂春臺一方無鼠偷狗竊之驚四境有犬吠雞

鳴之喜遠人率化荒服來王萬邦共惟帝臣天地莫非
王土開闢受吏梯航遠走於蠻中獻地稱蕃瓊璇幾半
於天下皆是八柱擎天之力並知四時成歲之功昭昭
簡在帝心籍籍頌諸人口前房杜而後姚宋何以加諸
左稷契而右皋夔不能過也此皆公議豈但私言自從
往古來今無不光前絕後雖禿干毫之兔難紀宏規縱
梓萬楮之皮莫形魯頌某備員官業托質洪鈞望南山
之維石崑崙幾年注目仰北斗之台星兩兩每夜勞魂

歎無路以掃門徒有心於投刺鳳衰已甚敢興楚接之
歌牛喘非時終冀邠吉之問特書悃悃上瀆高明造化
鑪中敢希陶鑄燮調手內全藉提攜果蒙自卯及翼之
恩不忘摩頂至踵之報

代上少師啟

伏審光膺大號榮貳三公凡屬生成舉同抃蹈竊以大
臣謀國元帥行師深惟用兵之難近請以唐爲喻裴度
之誅元濟名蓋淮西子儀之備吐蕃威宣關內然而軍

旅屢失歲月薦更或碎韓愈勒銘之碑或置朝恩疾功
之沮紛然異議沸於外庭未有燹祭朝陳散犬戎於沙
幕捷書夜奏復禹貢之山河服功於談笑之間紀績於
鼎彝之上雖曰天之時數豈非人之力爲恭惟樂宮先
生蘊德方剛受材宏大以山甫補袞之手應高宗協夢
之祥惟都惟俞可曰千載之遇知文知武是謂萬人之
英當巍巍乎有道之朝建岌岌乎無前之業父子俱登
三事君臣慶同一時四世五公何足道也一門萬石竊

且陋之已收玉版之榮行遂金甌之拜某猥緣望履獲
預執鞭永懷剪拂之私未効涓埃之報終當爲之殞首
且將依以揚聲身處江湖遐想平津之館職拘飛挽遙
稱北海之觴

代東林謝闕府啓

右某啟准使符授前件職事已祇受者竊以冠世名山
道德所在出塵淨社緇白同闕近偶厄於妄庸坐幾見其
傾覆宜得神穎以整頽網上以副王臣外護之勤下以

副叢林中興之漸如某者涖衆猶晚涉道未深五逢楚國之秋三涉湘山之刹特以宗風之盛悞爲學者所推偶預總提良出徼倖恭惟某官斯民先覺當世偉人世殿侯藩名獨簡於睿想入睽清禁道每格於君心期必代於天工蓋久從於人望某已次治境行瞻履商獲聞聲咳之餘倍切敘崇之素謹具啟陳謝伏惟台慈照察

代上湖南使者書

某聞趙清獻公奉使西州以一琴一龜自隨坐則撫琴

玩龜蜀人莫測寓止成都以書抵中朝故人曰成都全蜀之地沃野千里而多江山登臨之樂齋閣事簡時有山僧野人投詩而去諸公顧此吾事豈不流哉嗚呼山僧野人固無用於世然一造大人君子之庭飾鄙陋之詞敘棲遲之蹟則遂爲公卿美談恭惟某官文章之卓越風節之高特冠於搢紳雖功名事業之効未收而人主倚眷天下之屬望販夫乳兒莫不知頌詠盛德其遺風餘烈初不減清獻公而好賢樂善出於至誠則又過

之方持使者節來蒞三湘以萬壑之松聲爲琴以自養
之靈智爲龜當其酒酣客散頽然墮幘聽江風之度曲
觀湛然之發光若傲睨萬物之表而與造物者游其高
韻脫落當十倍西蜀但山僧野人之詩文未至庭下猶
以爲缺典某頃在丹陽獲陪今儀府相公符寶舍人父
子遊自南還頗獲翰墨切聞公蔡氏臥內客也敢自山
中攜至持以呈獻無所干求惟閣下憐其誠而進之爾

代上宣守書

某聞癡繩附驥氣凌千里兔絲依松勢登九仞兩物至微
陋也而其氣勢特能榮耀於昆蟲草木者蓋其所遭之
時所託之地適幸而已矣某寒鄉賤微人不比數賦命
數竒臨事金注困窮極矣所幸少游上庠識閣下一人
耳時閣下蔚然自持如喬松之推蒿萊養精蓄駿如騏
驥之困車軌某因得時交足以緣僕絡根以蔓衍也嗚
呼閣下以冠冕道德鼓吹六經聲名橫翔捷出措紳之
右富貴昂關聳壑青雲之上方掇天子近侍出鎮大邦道

顯著闕某塵埃寒乞面目可憎輒敢冒重湖涉大江千里
至前引物連類敘平生游從之好欲以駭動視聽聞者
多竊笑坐睡然區區之心終欲一望履舄者其情有真
可哀者耳某既爲功名悞罪大不孝二親之喪四弟之
柩皆在淺土家貧族陋默計之不一泣訴於門下是畢
世不能舉矣杜甫寒餓流離至食橡粟嚴武鎮兩川甫
依之得不死郭元振爲太學生家送貲四十萬會有緣
服者叩門自言五世未葬元振舉以與之嗚呼嚴武之

忠厚元振之節義蓋如此每讀其傳竊欣慕之恭惟閣下忠厚不棄故舊有嚴劔南之風度節義喜施有郭代公之竒豪而某無杜甫之才有不質名縑服者之喪某之辭家里巷聚送或疑或信疑者多而信者少此不足怪蓋節義未嘗有故也願閣下哀憐之使信者增氣而疑者沮氣矣

代求濟書

某聞金以自獻致不祥之名鴈以不鳴蹈必死之禍者

莊生寓意於兩物蓋所以配士之自獻亦又以罪士而不可不言也夫士臨死禍而不言世必以爲誇若困蹇之辱飢寒之憂已切諸身不翅如臥積薪之上而下焚之猶不以爲意鉗默不言使莊子不呵之三尺童子且聞以爲笑也某幸以諸生得侍師範瞻承顏色熏烝見聞一年于茲日月不爲不久而質疑受訓義在徑造面稟而已然特飾鄙陋之詞爲之書遂及私門之猥以上累聽覽者其情有可哀者耳儻蒙霽嚴有和則請畢其

說于前某讀漢傳見司馬長卿之還成都家四壁立又
讀唐帖見顏魯公從李侯乞米嗚呼漢唐人物如長卿
魯公者可謂碩大而秀傑者且屋廬不完餽粥不給況
下者乎然兩人者風流餘烈可以想見以某之不肖驚
鈍聲遺沉下蓋其智愚之不移貴賤之相遠無可企羨
然猶有羨於長卿魯公者羨其當耳長卿固倦遊而歸
所累者文君耳而猶有四壁可誇如某干祿而祿未及
親今親皆老無以爲養弟妹職職及婚嫁二十餘口伏

臘叢於一身而家無置錐之地魯公雖曰舉家彌月食
粥而有祿可仰有畜米者容其乞如某者族寒里陋無
強盛可依之親誰當告者聞古有魯肅指廩借周瑜則
以爲癡郭元振推錢四十萬與不言姓男子以爲狂則
有羨於司馬魯公未足爲過也某前此賃屋而居今有
屋者取以自用一家幼稚將至露地臥起矣恭惟先生
識妙如著龜納污如山澤剛而有禮人不得而踈親明
而無私士實樂於求懇昔劉政徃役邠原窮鳥入懷原

曰安知此懷之可入耶原之言蓋喜之也某恃先生之恩竟敢與劉政之謀干犯妄意先生必有原之喜而憐之

塔銘

夾山第十五代本禪師塔銘 并序

師諱智本筠高安郭氏子生五歲大飢有貴客過門見其氣骨留萬錢與其父母欲攜去祖母劉適從旁舍歸顧見怒曰兒生之夕吾夢天雨華吾家吉兆也寧飢死

不以與人推錢還之既長大遊報慈寺聞僧說出家因緣願爲門弟子劉氏喜曰此吾志也年十九試經爲僧明年受具足戒即往遊方時雲居舜老夫開先暹道者法席冠於廬山師往來二老之間久之聞法華端禪師者深爲法窟氣壓叢林蓋臨濟九世之孫也而楊歧會公之的嗣也師往謁之遂留十年名聲遠聞舒州太守李公端臣請說法於龍門辭去之日端領衆送之師馬逸而先顧端曰當仁不讓端笑謂大衆曰國清才子貴

家富小兒驕其父子法喜遊戲多類此未幾屏院事乃
還廬山時曾丞相由翰林學士出領長沙以禮迎居南
嶽之法輪學者爭宗向之遷居雲蓋自雲蓋遷居石霜
凡十三年道大顯著勸請皆一時名公卿師既老矣而
湖北運使陳公舉必欲以夾山致師師亦不辭欣然曳
杖而去人登問之答曰係情去留豈道人事湖南湖北
真一夢境爾何優劣避就之耶以大觀元年上元夕沐
浴更衣端坐終於夾山之正寢閱世七十有三僧臘五

十有二閣維齒骨數珠不壞葬於樂普庵之西師性真
率不事事膽氣蓋於流輩作爲偈語肆筆而成亦一時
禪林之秀者余未識師聞清涼洪禪師言其爲人甚詳
後二年門人處曉出開福英禪師所撰行狀來乞銘銘
曰

定慧圓明力無所畏顯於湘南遂起臨濟學者如雲異
人輩出唯會與南絕羣超逸號末法中二甘露門唯夾
山本寔會的孫七移法席籍甚聲華迅機雄辯能世其

家放懷清真亦足風味睥睨死生蓋其一戲白塔林間
矯如飛鶴不涉春緣碧巖花落

鹿門燈禪師塔銘

并序

西蜀世多名僧而魁竒秀傑者尤見於近代有如寶梵
大師昭符者弘經解義足以增光佛日太史黃公稱之
曰知文知武染衣將相者也嗣承其學有如圓明大師
敏行者家聲辯才足以舟航苦海內翰蘇公稱之曰能
讀內外教博通其義以如幻之三昧爲一方首者也兩

公今朝第一等人意所與奪天下從之而寶梵圓明特
被賞識兩川講徒增氣四海縉紳想見風裁也鹿門禪
師蓋嘗以父事圓明以大父事實梵觀其規模弘大教
觀淹博熏烝見聞有自來矣師諱法燈字傳照成都華
陽王氏子也自幼時則能論氣節工翰墨逸羣不受世
緣控勒年二十三剃落於承天院受具足戒即當昔楞
嚴講耆年皆卑下之時黃太史公謫黔南與圓明遊相
好每對榻橫麈師必侍立看其談笑公撫師背謂圓明

曰骨相君家汗血駒也他日佩毗盧印據選佛場者必此子也常夜語及南方宗師公曰今黃龍有心泐潭有文西湖有本皆亞聖大人曹谿法道所在或欲見之不宜後於是圓明棄講出蜀師侍其行至恭州而歿師扶護歸葬成都辭塔而去下荆江歷淮山北抵漢沔徧謁諸老所至少留機語不契振策即行登大洪謁道楷禪師楷問如何是空劫自己對曰靈然一句超羣象迥脫三乘不假修不落有無更道取一句曰待某甲無舌即

與和尚道楷駭之師乃伏膺戾止承顏接辭商略古今
應機妙密當仁不讓師資相懽不減瀉山之與寂子趙
州之與文遠也大觀之初楷公應詔而西三年坐不受
師名敕牒縫掖其衣謫緇州師趺足隨之緇之道俗高
其義太守大中大夫李公擴虛太平興國禪院以居之
於是洞上宗風盛於京東政和元年楷公得釋則東遁
海瀕千餘里太湖中而止草衣澗飲若將終焉豈非狀
名迹之爲累也歟師猶往從之楷以手擲揄曰雲巖路

絕責在汝躬行矣師識其意再拜而還七年解院事西
歸京師名聞天子俄詔住襄陽鹿門政和禪寺師謝恩
罷退飯丞相第堂吏抱牘至白曰江州東林寺當改爲
觀從道士所請師避席曰廬山冠世絕境東林又其勝
處世爲僧居如春湖白鷗自然相宜今黃冠其中絕境
其厄會乎丞相大以爲然東林之獲存師之力也既至
漢上郡將諷諸山辦金帛詣京師作千道齋師笑曰童
牙事佛有死無二苟非風狂失心輒以十方檀施之物

千里媚道士耶郡將愧其言而止然天下叢林聞而壯之鹿門瀕漢江斷岸千尺寺嘗艱於水師坐巖石下念曰吾欲叢林此地爲皇朝植福而泉不能瞻衆山靈其亦知之乎師以杖擿草根俄衆泉感發一衆大驚山中之人目之曰燈公泉師初依夾山齡禪師齡道孤化而無嗣之者僧惟顯得其旨隱於南嶽師以書抵長沙使者迎出以居龍安禪寺聞者伏其公貴其行初惠定禪師自覺革律爲禪開剏未半而逝蝘藏蜂聚故窠遺埴

十猶七師爲一新之長廡廣廈萬礎蟠崖冬溫夏清崇
堂傑閣十楹照壑吞風而吐月榷拂之下五千指十年
之間宗風大振人徒見其婆娑勃窣若遊戲然不知其
中至剛峭激也篤信所學雖威武貴勢不敢干以非義
性喜施不計有無傾困倒廩以走人之急靖康二年春
金人復入寇兩宮圍閉驚悸不言謝遣學徒杜門面壁
而已門弟子明顯白曰朝廷軍旅之事何預林下人而
師獨憂念之深乎師熟視徐曰河潤九里漸洳者三百

步木仆于仞蹂踐者一寸草豈有中原失守而林下之人得寧逸耶五月十三日中夜安坐戒門弟子皆宗門大事不及其私泊然而逝檢其所蓄道具之外書畫數軸而已閱世五十有三坐三十夏度門弟子明顯等七十餘人受心法蒙記蒞潛通密證匿迹韜光者甚衆二十一日全身塔于山口別墅惠定塔之東明顯狀其平生來乞銘銘曰

空劫日用易知難分汝欲分之如聲與聞何嘗有間月

徧谿谷何嘗有斷風偃松竹於一毫端捏聚古今粲然
明了而不可尋無功之功無位之位爲物作則無容觸
諱唯此正傳洞上所宗當有神穎振其頽風堂堂燈公
龍象回顧負戴之重徐行安步漢南盤本兩坐道場枵
然一室名聞諸方孝於事師忠於事佛俯仰無愧雖化
不沒聞名在世決不可除則於心外法有遺餘竟欲除
之出以示我笑而不言如冰在火蘇嶺萬仞蕩摩雲煙
曰塔其下望之巋然緬懷高風叢林殞涕我作銘詩以

范來世

蘄州資福院逢禪師碑銘 并序

自達磨入中國授二祖心要而以衣爲信故六世爲之
單傳至曹谿藏其衣故諸方得者輩出其魁壘絕類碩
大光明有若衡山觀音廬陵清原者特爲學者之所宗
仰天下號二甘露門今逢禪師者清原九世之嫡孫黃
龍機公之高弟也此先蓋福州閩縣人生於陳氏自其
少時英特開爽不愛處俗者年敬愛之唐乾元初落髮

於隱真寺明年受具足戒即策杖遊方聞黃龍參出巖
頭門風孤峻自荆楚舟漢江抵鄂渚而機公杜門却掃
棧絕世路學者皆望崖而退師獨扣其戶俄聞疾呼曰
擊門者爲誰答曰令逢曰未來此間亦不失答曰若失
爭辭與麼來曰來底事作麼生答曰昨日親自渡江黃
龍於是開扉笑而器許之師從容遊詠日聞智證雖不
事接納而戶外之屨常滿痛自韜晦而人間之譽益著
以順義癸未之秋辭黃龍北遊戾止祁陽月峯之下旃

爲茅茨一飯奉身跣趺終日學者追隨而至川翰雲委
前刺史竒章公拜謁受法要而請升座道俗懽呼謂一
佛出世遂成叢林號南禪男子張宏甫施宅爲寺莊嚴
之妙疑絳闕清都從空而墮也歲在戊子夏淨髮更衣
而坐謂門弟子曰吾委息後衣麻饌客號踊哭泣皆不
可爲苟違吾言則非吾法侶於是書徧辭檀信六月
八日示微疾泊然而化閱世五十有一坐三十四夏塔
于郡城之北太和中忽見夢於父老曰吾欲出塔大作

佛事於是啟塔而顏貌如生萬衆作禮龕而供事之自是則能指揮造化縱奪禍福使雨暘時若百穀茂遂民建寺其旁世以父子傳器夜燈午梵自唐迄今不替政和之間禪林易之更兩代荒殘如逃亡人家宣和太守林公以嘉祐寺彌勒院僧擇文王之從檀之請也文踈通解事材智有餘道行信於邦人初至之夕適大雨九徙其牀一年而施者填門冠蓋無虛日二年而修廡密室綠踈青鎖三年而崇殿傑閣間見層出遊僧過客摩

肩仍袂已至者忘去方來者如歸余嘗與林敏功子仁
過焉仁曰寺以律名而禪規不減諸方廩無餘粟食堂
日集千指非有大過人何以臻此余曰昔臨濟北歸
仰山歎曰此人它日道行吳越但遇風則止瀉山問有
續之者乎對曰將此深心奉塵刹是則名爲報佛恩故
世稱念法華爲仰山後身庸詎知文非逢公邪子仁曰
彼以荷擔大法此方從事有爲仰山逢公若是班乎余
曰昔普淨禪師不務說法庵於王城之東日浴萬衆曰

時機淺昧難提正令姑使善法流行足矣又安知逢公之意不出於此乎明年冬遣其徒來乞文又系之以辭

曰

我懷巖頭僧中之龍本無寔法但識綱宗乾笑德山怒呵雪峯如師子吼香象失蹤又如麒麟不可繫羈羅山控勒明招追隨逢則晚出天骨權竒振鬣長鳴萬馬不嘶清侯之上駐我巾瓶笑示死生洞開戶庭意行出入不施鑠局至今城北白塔亭亭寶鈴和鳴上千層霄下

有全身百神來朝劫火洞然大于焚燒而此堅固無有
動搖咨爾邦民當加敬虔蓋此大士是汝福田如黃琳
公如和褒禪刻此銘詩以壽山川

三角劫禪師壽塔銘

并序

禪師道劫生謝氏邵武人也得法於洪州石門乾禪師
初住臨川之景德寺後住長沙之角山道望著三湘學
者至如歸十餘年遂爲終焉之所門弟子爲建壽塔于
白雲衝之陽甘露滅某宣和五年十月初二日過焉劫

導余至塔所乃爲銘之銘曰

東林法道盛於石門在元祐間歸者如雲後三十年三角有聞石門嫡子東林諸孫道如平地世不舉步陟危值谷自爲險阻有來求者弗答弗顧但以此心一酬佛祖白雲之衝卯塔已成如魚千里時遶之行千巖月色萬壑松聲欣然而笑誰爲死生

嶽麓海禪師塔銘

并序 代

師名智海姓萬氏吉州太和人也幼靜專無適俗韻去

事普覺道人楚金爲弟子年二十一剃髮受具辭金遊
方金出鄧峯永公門父子道價逼亞東林總玉澗祐故
師依玉澗東林最久然無所契悟晚抵仰山陸沉於衆
佛印元公獨異之師方銳於學喜翰墨元呵曰子本行
道反從事語言筆畫語言筆畫借工於道何益矧未工
乎師於是棄去經行湘南諸山依止大漚十年真如門
風號稱壁立學者皆望崖而退師獨受印可輩流下之
真如赴詔住上都相國寺師雅志不欲西首衆衲於衡

陽花樂山分座說法元符已卯開法於城東之東明崇
寧乙酉遷居於湘西之嶽麓勸請皆一時名公卿明年
正月八日麓火一夕而燼道俗驚嗟以死弔師笑曰夢
幻成壞蓋皆戲劇然吾恃願力宮室未終廢也於是就
林縛屋單丁而住雜蒼頭廝養運瓦礫收燼餘之材造
牀榻板隔凡叢林器用所宜有者皆備曰棟宇即成器
用未具是吾憂故先辦之聞者竊笑而去師自若也未
幾月富者以金帛施貧者以力施匠者以巧施十年之

間厦屋崇成盤崖萬礎飛楹層閣塗金間碧如化成梵
釋龍天之宮人徒見其經營之功日新而不知其出於
閒暇談笑宣和己亥七月九日以平生道具付侍者使
集衆估唱闕明漱盥罷坐丈室聞粥鼓命門弟子因敎出
世本末祝以行道勿懈說偈爲別有智暹者進曰師獨
不能少留乎師以手搖去復周眴左右良久右脇而逝
閱世六十有二坐四十有二夏又七日闍維收骨石塔
於西崦舜塘之陰余官長沙始歎師雖其道眼無分別

相而州里情親若出自然故知其爲人惠敏有智略恤孤
老赴急難常器人於羈賤中屢折不因其尊禮賢者樂
於人爲善則其天性嘗叩其論於宗門號飽參於教觀
甚博而知要不見十日而以訃聞嗚呼余聞論事易成
事難捨生易處死難師皆返是豈無德而然耶南牧齊
公狀其平生乞銘於余因爲之銘曰

臨濟綱宗遇風則止昭憂其識得念而喜湘南有圖汾
陽之嗣遂與其宗克肖前懿衲子方來歸之如雲南真

兩俊絕塵逸羣海公於真蓋其的孫獨敢袒肩荷擔宗
門天資慈祥一目貴賤幻出寶坊實依淨願冤親贊毀
初莫能辨及其將化則有明驗入死之難如登焚輪師
獨易之如臂屈伸塔曰無縫豈有新陳我作銘詩昭示
學人

石塔銘并序

瀛山空印禪師軾公與余登芙蓉謁長老從公于潮音
堂同遊東澗道人師梁法欽文顯預焉空印使同遊者

以石系塔于澗之曲從笑曰連日羣鵲翔鳴豈此勝緣之祥耶空印請甘露滅某銘曰

萬峯之顛乃有流泉迸兩石間雪渦回旋嶮于三峽下臨玉淵上有危石其大如屋可坐百夫辭封蒼玉同來六僧五七童僕妍鄙俱笑響答山谷唯大士軾約束長幼疊石爲塔團團層秀於一食頃談笑而就其願伊何天子萬壽山禽何知羣飛和鳴物不虛應勝事克成咨爾東阿地祇山靈護持此塔使長聽經

馮氏墓銘并序

洪州布衣高天倪弟冲賜紫沙門善機傳法沙門善權
以政和五年十月某日葬其母馮氏於幽谷山之陽附
于皇考隱君之塋冲茹哀具書曰禍釁塵罰不自殞滅
上延慈侍冲尚忍言之先妣於正月三日棄諸孤於正
寢享年七十有三願請文以昭後世三反而不得辭乃
敘曰夫人靖安馮氏年十六歸同邑隱君子高廣仲容
入門和敬動履規矩懿淑而敏出於天姿媪御喜之與

奪從之時皇舅春秋高癯而盲夫人行立必掖食必嘗
姑有風痺疾夫人視臥起進劑餌皆畢世不懈里閭稱
其孝仲容三弟稚幼夫人皆自擲沐縫紉之以至成立
擇師使授學典婚使納婦有勞有恩夫人幼孤未嘗學
隱君好與禪衲遊屏聽其論而悅之遂能誦經曉字義
隱君無經世意多往林墅屏處五子皆夫人教之訓嚴
色莊衣冠取法焉初幼子善權俊發夫人曰此兒非仕
林可致也施以從石門道人應乾游以文學之美致高

名於世第三子善機亦授筆與之俱叢林期以起東林之道長子天倪粹溫而厚誠欸而文里巷徃來稀識其面第四子冲久遊太學以能文舉于禮部所與交皆一時偉人次子怛廓落有奇節不幸早世而孫楷學成而鄉貢之夫人喜燕賞酒酣冲必利髻爲童子戲婆婆起舞皆中部節弟姪以次上壽觀者歡譁夫人爲笑而罷率以爲常邑人慕之女一人適貢士劉抗孫九人皆疑疑爭秀曾孫兩人尚幼銘曰

俊發矯士母數責孟軻廢學母斷織凜然夫人嗣遺則
子孫繩繩詩與書名聞縉紳榮里閭何以訓之孚威如
膝下時聞裂縫掖頷之而笑無怙色衣冠三彥僧連璧
死生亦大能了然誦經而化如蛻蟬我作銘詩騁其賢

石門文字禪卷二十九

欽定四庫全書

石門文字禪卷三十

宋釋覺範撰

行狀

雲庵真淨和尚行狀

師諱克文黃龍南禪師之的嗣陝府閩鄉鄭氏子生而
穎異在齟齬中氣宇如神人與羣兒戲輒相問答語言
竒怪聞者駭愕不能曉則復軒渠笑悅而去奕世縉紳
既長喜觀書不由師訓自然通曉事後母至孝母嚚數

困辱之親舊不忍視其苦使游學四方旅次復州北塔
寺長老歸秀道價方重於時詞辯無礙因側聆坐下感
悟流涕願毀衣冠爲門弟子秀笑曰君妙年書生政當
唾手取高第榮親乃欲委迹寂寞豈亦計之未熟耶對
曰心空及第豈止榮親又將濟之委迹寂寞非所同也
秀竒其志而納之服勤五年如一日年二十五歲試所
習爲僧明年受具足戒即游京洛翱翔講肆賢首慈恩
性相二宗凡大經論咸造其微解帙捉麈詞音朗潤談

辯如雲學者依以揚聲燕居龍門山偶經行殿廡間見
塑比丘像蒙首瞑目若在定者忽自失謂同學者曰我
所負者如道子畫人物雖曰妙盡終非活者既焚其疏
義包腰而南平易艱險安樂勞苦諸方大道場多所經
歷自重其才以求師爲難嘗至雲居謁舜老夫機語不
契不宿而去又至德山應禪師方夜參雌黃先達有六
祖不及雲門之語失笑黎明發去聞雲峯悅禪師之風
兼程而往至湘鄉悅已化去歎曰既無其人吾何適而

不可山川雖佳未暇游也。因此行寓居大瀉。夜聞僧誦雲門語曰：佛法如水中月，是否云清波無透路，豁然心開時。南禪師已居積翠徑，造其廬。南曰：從什麼處來？曰：瀉山南曰：恰值老僧不在。曰：未審向什麼處去也。南曰：天台普請南嶽雲游曰：若然者亦得自在去也。南曰：脚下鞋是甚處得來？曰：廬山七百錢唱得。南曰：何曾得自在？師指曰：何曾不自在？耶南公大駭，參依久之，辭去。至西山翠巖，長老順公與之夜語，自失曰：起臨濟者子也。

厚自愛而師亦神思豁然德其賞音及南公居黃龍復
往省覲南公嘗謂師曰適令侍者卷簾問渠卷起簾時
如何侍者無語汝作麼生師曰和尚替侍者下涅槃堂
始得南厲語曰關西人真無頭腦乃顧旁僧師指之曰
只這僧也未夢見在南公笑而已隆慶間禪師與師友
善方掌客閒問曰文首座何如在黃檗時南公曰渠在
黃檗時用錢如糞土今如數世富人一錢不虛用自是
爲同時飽參者所服南公入滅學者歸之如雲所至成

叢林熙寧五年住筠州大愚太守錢公弋來游怪禪者
驟多衆以師有道行奔隨而至錢公即其室未有以奇
之翌日命齋師方趨就席有犬逸出屏帷間師少避之
錢公嘲之曰禪者固能伏虎反畏犬耶師應聲曰易伏
隈巖虎難降護宅龍錢公大喜願日聞道乃虛聖壽寺
命師居之師方飯於州民陳氏家使符至遁去錢公繫
同席數十人將僧吏求必得之而後已有見於新豐山
寺者即奔往陳氏因叩首泣下曰師不往吾黨受苦矣

師曰以我故累君輩如此因受之遂闡法焉未幾移居
洞山普和禪院元豐之末思爲東吳山水之游捨其居
扁舟東下至鍾山謁丞相舒王王素知其名閱謁喜甚
留宿定林庵時公方病起樂聞空宗恨識師之晚謂師
曰諸經皆首標時處圓覺經獨不然何也師曰頓乘所
談直示衆生日用現前不屬今古只今老僧與相公同
入大光明藏遊戲三昧互爲賓主非闕時處又曰經云
一切衆生皆證圓覺而圭峯易證爲具謂譯者之訛其

義如何師曰圓覺如可改則維摩亦可改也維摩豈不
曰亦不滅受而取證夫不滅受蘊而取證與皆證圓覺
之義同蓋衆生現行無明即是如來根本大智圭峯之
言非是公大悅因捨第爲寺以延師爲開山第一祖又
以神宗皇帝問安湯藥之賜崇成之是謂報寧歲度僧
買莊土以供學者而自撰請疏有獨受正傳力排戲論
之句者敘師語也又以其名請於朝賜紫方袍號真淨
大師金陵江淮大會學者至如稻麻粟葦寺以新革室

宇不能容士大夫經游無虛日師未及嗽盥而戶外之
履滿矣殆不堪勞於是浩然思還高安即日渡江丞相
留之不可遂卜老於九峯之下作投老庵紹聖之初御
史黃公慶基出守南康虛歸宗之席以迎師師曰今老
病如此豈宜復刺首迎送爲我謝黃公乞死於此其徒
哀告曰山窮食寡學者益衆師德臘雖高而精神康強
康山自總祐二大士之後叢林如死灰願不忘祖宗赴
輿情之望不得已乃行先是黃公嘗望見師於丞相廣

坐中師既去丞相語公曰吾閱僧多矣未有如此老者
故公盡禮力致之廬山諸刹素以奢侈相矜居者安輒
暖師率以枯淡學者困於語言醉於平實師縱以無礙
辯才呵其偏見未暮年翕然成風三年今丞相張公商
英出鎮洪府道由歸宗見師於淨名庵明年迎居石門
崇寧元年十月示疾十六日中夜沐浴更衣趺坐衆請
說法師笑曰今年七十八四大相離別火風既分散臨
行休更說遺戒弟子皆宗門大事不及其私言卒而歿

壽七十八臘五十二荼毗之日五色成燄白光上騰煙
所及處舍利分布道俗千餘人皆得之餘者尚不可勝
數塔於獨秀峯之下師純誠慈愛出於天性氣韻邁往
超然竒逸見人無親疎貴賤溫顏軟語禮敬如一主持
叢林法度甚嚴有犯令者必罰無赦以故五坐道場爲
諸方所法得遊戲三昧有樂說之辯詞鋒智刃斫伐邪
林如墮雲崩石開發正見光明顯露如青天白日人人
自以謂臻奧至於入室投機則如銅崖鐵壁不可攀緣

性喜施隨有隨與杖笠之外不置一錢行道說法五十餘年布衣壞衲翛然自守於江西有大緣民信其化家家繪其像飲食必祠嗣法弟子自黃檗道全兜率從悅而下十人餘此其平生大槩也至其道之精微皆非筆墨可能形容竊嘗論之其棄儒冠而入道類丹霞奔經論之學而穎悟類南泉尋師之艱苦凜然不衰類雪峯說法縱橫融通宗教類大珠至於光明偉傑荷擔宗教類百丈此非某之言叢林學者之言也嗚呼兼古宗師

之美而全有之可謂集厥大成光於佛祖者歟崇寧二年十月十五日門人某謹狀

泐潭準禪師行狀

公諱文準興元府唐固梁氏子生始幼見佛像輒笑張牙不喜聞酒馘金仙寺沙門虛普乞食至其家師鷹門酬酢如老成時年八歲即辭父母願從普歸授以法華經伊吾即上口元豐僧檢童子較所習以籍名先後度師藝精坐年少不得奏名陝西經略范公過普廬普臘

高應對領略師侍其旁申辯詳明進止可喜范公欲攜
與俱西師辭曰登山求玉入海求珠人各有志本行學
道世好非素心范公陰竒其語度以爲僧剔髮既往依
梁山乘禪師呵曰驅烏未受戒敢學佛乘乎師捧手曰
壇場是戒耶三疊羯磨梵行行阿闍梨是戒耶乘大驚
師笑曰雖然敢不受教遂受具足戒於唐安律師徧游
成都講肆倡諸部綱目即棄去曰吾不求甚解大法師
曇演佳其英特撫之曰汝法船也南方有亞聖大士

有若瀉山真如九峯真淨者知之乎宜徃求之師拜受
教與同學志恭出詣瀉山久之不契乃造九峯見真淨
於投老庵問曰什麼處來對曰興元府曰近離何處曰
大仰曰夏在什麼處曰瀉山真淨展手曰我手何似佛
手師罔然左右視真淨呵曰適來句句無絲毫差錯靈
明天真才說箇佛手便成隔礙病在甚處師曰不會真
淨曰一切現成更教誰會師服膺就弟子之列餘十年
所至必隨紹聖三年真淨移居石門衲子益盛凡入室

叩問必瞑目危坐無所示見來者必起從園丁壅菜率
以爲常師每謂公曰老漢無意於法道乎莫能測也一
日舉杖決渠水濺衣因大悟方見老人平日用處走敘
其事真淨罵曰此中乃敢用磊苴耶自是迹愈晦而名
聲愈著自其東游淮淝所至衲子成叢林顯謨閣待制
李景直守洪州仰其風請開法於雲巖未幾殿中監范
公帥南昌移居泐潭方是時禪林以飲食爲宗以輦暖
爲嗜好以機緣爲戲論師悲歎之師槌拂之下常三百

人而宿戶外者又百餘許求入室就學師難之乃謂之
曰十方無壁落四面亦無門闔梨從什麼處入對皆不
契每曰我只畜一條拄杖佛來也打祖來也打不將元
字脚浣汝枯腸如此臨濟一宗不到冷落學者莫窺其
奧然升堂說法辯如建瓴不留影迹一時公卿大夫宗
向之以政和五年夏臥病侍者進藥餌師泛然如無意
誠須忌食毒物師亦未嘗從有問其故曰病有自性乎
病無自性則毒物寧有心乎以空納空吾未嘗顛倒而

汝輩欲吾昏迷耶七月二十二日更衣說偈而化閱世五十有五坐三十五夏閣維得舍利晶圓淨光不壞道俗千餘人皆得之門弟子等收塔于南山之陽嗚呼雲庵之神悟於南公之門超軼絕塵者也予每疑嗣之者難及觀師之風格殆所謂家名辯才氣宇逸羣者耶謹狀

花藥英禪師行狀代

臨濟九世之孫雲庵真淨之嗣師諱進英字拙叟出於

羅氏其先吉州太和人幼孤母憐之性慧敏齟齬中日
誦千餘言通詩禮大義與羣兒嬉游侮玩之氣出其上
親舊愛敬之使著縫掖爲書生輒病至於死鄰母泣曰
吾始娠夢有乘空而語曰而出家則疾有瘳矣於是擊
鐘梵放誓於佛前乞以爲僧洞隆童子而籍名於善集
才年十八試所習得度受具戒即欲經行諸方以觀道
報劬勞之德其母有難色於是庵於母室之外名曰精
進士大夫喜其爲人賦詩爲贈多佳句螺川父老迨今

道之母歿心喪三年修白業爲冥福卽游淮海所至少
留常時號明眼尊宿徧謁已雖未契而嘗識多賢者晚
謁雲庵夜參聞貶剝諸方以黃檗接臨濟雲門接洞山
機緣爲入道之要擿其疑處以啟問師恍然大悟如桶
底脫佛印禪師叢林號大宗師有盛名慎許可獨以師
爲俊彥師有爽氣喜暴所長以激後學三十年一節不
移故佛印呼爲鐵喙初開法任長沙之開福十年之間
殿閣崇成又五年棄之翩然北游五臺徧覽聖蹟乃南

還庵梁山天下衲子益追崇之政和甲午衡陽道俗迎
住花藥之天寧勸請皆一時名公卿師以教外別傳之
宗授上根以漚和般若化道俗老益康強精進不替嘗
中夜禮佛作息飲食不肯與衆背叢林信其誠民人化
其教得法而爲一方領袖者不可勝數槌拂之下嘗二
千指龍象雜還方進而未艾也其激揚大事游泳語言
備存三錄曰報慈曰鴈峯游臺盛行於世宣和三年冬
謝事復庵梁山越明年臘月示疾蟬蛻嗚呼若人已矣

子竊爲桑門惜之參學稟淳一日泣訴於予以予知其師之深者欲干其狀而求銘故爲書云耳長沙孫承之謹狀

傳

十世觀音應身傳

并贊

唐大菩薩僧寬公出於益州孝水楊氏方其娠也母失常性却酒敵有慧辯及其生也無痛苦聞異香忽然在前即能言言我名慧寬有女兄信相亦神異年相睽於

韶亂中終日論說聽者一不能曉其父瑋以符呪爲兩
川道俗所歸而不知有佛經人錄其所論百許紙時懷
龍山會禪師聞其異至瑋舍瑋出示之會驚曰與佛經
合不測人也俄有異比丘入火光三昧於淨慧寺特召
信相信相至曰此室皆火聚其可入哉曰以水滅之可
入信相即作水觀而入於是異比丘化其父母使出家
父母曰許聘矣奈何鄉里爭出財贖之公因信相亦俱
依慧空寺慎公避太祖御諱剃落焉公時年十三從會

公授經律會畏之如神反從質疑天姿謙敬未嘗怒懷
龍衆三千指皆躬力作公獨閑適人以爲言會曰此吾
先師也昔周滅吾法吾從曇相禪師隱于終南山及隋
教復興吾辭而歸蜀曇相囑曰汝當領徒大作佛事有
童子名慧寬者善視之此其後身衆因不敢復言公年
三十乃還綿竹廬于無爲山以神異化而全蜀爭師事
之如淮泗之僧伽七閩之定光公嘗赴江陵大會朝發
夕返荊州府前有拳石舍五音天下聞之公取以歸今

置定身龕中什邡陳氏施園爲寺公以竹標其中曰以此爲基拔去竹泉泣然而出掘之得巨石石下有寶瓶舍利公作禮乃放光永徽四年夏六月二十有五日夜歿於淨慧寺閱世七十坐五十五夏

贊曰予讀無爲山廣錄公始發心日誦觀世音名十萬徧生五天十世爲居士生震旦十世爲比丘皆出楊氏又瞻其畫像天骨秀特和敬之威望之肅然是所謂真比丘也

鍾山道林真覺大師傳

梁大菩薩僧寶公以宋元嘉中生於金陵之東陽民朱氏之婦上巳日聞兒啼鷹巢中梯樹得之舉以爲子面方瑩徹如鏡手足皆鳥爪七歲去依鍾山大沙門僧儉爲童子儉名之曰寶誌長而落髮專修禪觀坐必越旬久之忽無定居多往來皖山劔嶺之下髮而徒跣著錦袍飲啖同於凡俗恒以鏡銅剪刀鑷屬挂杖負之而趨經聚落兒童諱逐之或徵索酒榖或累日不食嘗從食

鱸者求鱸食者與而心笑之即起吐水中皆成魚相傳
始驚異時時題詩初不可曉後皆有驗建元間異迹甚
著丞相高嵩爲武帝言之以禮自皖山迎至都舍於陳
征虜之家輒自釐其面分披之出十二首觀世音慈嚴
妙麗傾都聚觀欲爭尊事之武帝念其惑衆收付建康
獄旦夕咸見游行市里既而檢校猶在獄中其夜又語
吏門外有兩輿金鉢盛飯汝可取之果文惠太子竟陵
王送供至建康令呂文顯以事啟帝帝迎至禁中俄有

旨屏除後宮爲家人宴公例常與衆出已而猶見行道於景陽山比丘七輩從其後帝怒遣使至閤吏曰公久出在省中吏就視之身如塗墨然武帝聞之大驚陳顯達鎮江州大司馬段齊之從行往辭公公無他語但引紙畫鷓鴣畫畢授之曰緩急可用此顯達叛齊之遁去顯達大怒遣騎追之將及齊之窘甚見鷓鴣林必非人所寄遂去齊之方悟公意也鄱陽忠烈王飯公於私第顧左右覓荆枝有折以獻者則以安門上而去俄有旨以王

領荊州衛尉胡諧臥病以書哀訴幸以屈臨庶幾疾有
瘳公題其書尾曰明屈翌日果卒僧法平欲以衣獻公
不知所寓遣使徧求之龍光薊賓兩寺皆曰夜宿此黎
明去矣又嘗所厚善厲侯伯家侯伯曰公夜行道於此
今睡未興使人視之笑去公在華林園忽重著三布帽
亦不知自何得之俄而武帝崩文惠太子豫章文獻王
相繼崩齊亦於此年闕矣靈味寺沙門寶亮欲以衲被遺
之未及有言公忽來牽帔而去蔡仲熊嘗問仕何所至

公不自答直解杖頭左索繩擲與之莫之解仲熊果至尚書左丞永明中住東宮後堂平旦門中出入末年忽云門上血污衣褰裳走過至鬱林見害果以犢車載屍自此門舍故閣人徐龍駒宅而帝頭血流於門限焉建武中明帝害諸王高士江泌憂念南康王子琳以訪公問其禍福公覆香爐示之曰都盡無餘後皆如其語徐陵兒時其父攜詣公公拊之曰天上石麒麟也陵果名譽顯於世又文惠太子迎釋僧惠至京師惠過公公拊

其背曰亦龍子也慧終以辯才顯聞其徒屯騎桑偃有不臣之心公見之戟手詬曰若乃欲反耶奈斫頭穴胸何偃汗下不敢仰視遁去梁武帝受禪尤深敬事前朝以超放動輒禁錮至是下詔釋之嘗問曰弟子煩惑未除何以治之答曰十二又問十二之旨在何答曰書字時節刻漏中又問何時得淨心修習答曰安樂禁之又問年祚遠近答曰元嘉元嘉帝欣然以爲享祚倍宋文之年天監五年冬旱雩祭備至而雨不降公謂左右

曰吾病不差就官乞活儻不奏白官應得禍即上啟願
於華光殿講聖髮經請雨帝即命沙門講之終夕雨公
又以刀橫水盂良久又雨帝初繁刑公假以神力令見
高祖受極苦於地下自是省刑詔畫工張僧繇寫公像
藏禁中僧繇下筆輒不自定叩頭哀懇公笑曰毗婆尸
佛早留心直至而今不得妙帝偶與公臨流縱望有物
汴流而上公舉杖引之隨杖而至蓋紫梅檀也詔供奉
官俞紹雕公像頃刻而肖神情如生帝大悅命置內庭

爲子孫世世福田法雲寺雲光師講經天爲之雨華帝
意其證聖夜於舍光殿焚疏命公雲光僧儉傳大士齊
翌日獨雲光不至公嘗聽法雲講妙法蓮華經至假使
黑風問風果有否答曰世故有第一義諦故無公曰若
體是假有此亦可解耶法雲默然公則自爲主客辯難
鋒生一坐盡傾然莫有解者帝嘗從容問國祚有留難
否公但指喉示之侯景之亂尤追繹公言也有僧浮杯
來謁帝帝方與客碁吟曰殺之碁罷命僧侍衛奏曰適

蒙旨已殺之矣帝嗟悼不已以問公公曰陛下前身蚯蚓也僧嘗爲雜草者悞殺之今償夙債耳夫監十三年公移華林園金像置所居房帝聞之曰師將去我耶是歲十二月忽命奏絲竹徹晝夜至六日終於興皇寺臨亡然一燭以付後閣舍人吳慶以聞帝歎曰大師不復留矣燭者將以後事囑我乎帝昔與公登鍾山之定林指前岡獨龍阜曰此爲陰宅則永其後帝曰誰當得之公曰先行者至是念公以此言以金二十萬易其地以

葬焉皇女永康公主薨盡施其粧奩建浮圖五層于其上置以無價寶珠仍建開善精舍勅陸倕製銘于塚内王筠勒碑於寺門處處傳其遺像焉畢工駕御寺公忽現於雲間萬衆歡呼聲振山谷勅謚廣濟大師公顯迹之著數可五六十許及終亦不老莫測其年有徐健道者年九十三自言是公外舅弟小公四歲計其時九十七矣李氏有國日謚曰妙覺公作四柱記五公符十二時偈壁記心鏡圖數千言傳于世本朝太平興國七年

舒州民柯萼者遇異僧於歲山下以杖指松根令萼鑿之得瑞石一篆文皆識聖宋國祚無疆萼進其石于京師太宗皇帝遣中使置齋於鍾山詔自今不可以名斥以顯尊異賜號道林真覺大師

祭文

祭雲庵和尚文

我生九歲則知有師寤寐悅慕想見形儀識師新豐等父母慈欣然摩頂使執軍持長游大梁雉髮而歸省於

九峯凜然德威霜雪雨露物以茂滋師成就我妙如四
時紫霄之下泐水之湄前後七年龍起雲隨今古一律
妬毀陷擠愛憐收拾終不棄遺我昔出山師則有辭子
幼英發終必有爲顧吾老矣見子無期指其二子藉汝
教之謹呵皆可不可相離德音在耳星霜八移師成新
塔我亦陳衰昔師既化品坐對啼僉遣本明遠乞銘詩
事濟而還僵仆於地山川隔阻久絕音題獨攜希祖千
里來辭一酬夙心死無憾悲師之平生累德巍巍必興

其後在我無疑敢不激勵上答恩私

祭昭默禪師文

政和八年二月初六日甘露滅致以香羞之奠祭于佛
壽靈源真歸無生之塔寶覺以拳授法宗綱區別背觸
天非蒼蒼如履虎窞非愚則狂公少竒逸發矧劍鉞橫
機試之切玉無傷體露情盡凡聖兩忘瀉仰機辯如珠
走盤父喜自匿暴子所長追還此風名聞諸方臨濟法
道始於南昌大於汝潁盛於衡湘黃龍三闡建無勝幢

奕世護持不離覺場天魔愁怖走仆且僵剪拂流輩高
師門牆庸有匪人賣公自揚騏驎種性自異犬羊狼觸
怒疾夫豈知量儼臨清泉精嚴激昂如萬星月如百谷
王高明廣大洞徹汪洋成就法器堅翅飛翔下視毒龍
命將滅喪劃海爲兩搏而取將老則移疾古寺開房聽
萬象說以默自藏猿鳥厭見天下想望我初見公駸氣
騰驤溟滓弟之但加敬莊人以謗掩公慰愈光置麝溺
器更增其香取而有之麓于藥囊坐交時埋甕于南荒

零落苦李人棄路旁公犯世忌愈益稱賞萬人浮議冰
消其湯既幸生還陸沉故鄉豈不願見恃公康強訃至
失聲事出倉皇中流欲濟俄喪楫航夜淚殷枕起喟失
牀我憂禪學終背教綱造論導之排斥否臧公聞乃曰
彼自無瘡以書教誡歌傾數行至言吐鳳自然文章馬
鳴龍勝論著精詳文字於道疑不相妨索珠層淵探玉
崇岡人各有志鹹酸異常但餘此意拜未敢當嗟吁惜
哉巍巍堂堂遂成千古叢林荒涼然觀斗柄陰晴晦彰

示有出沒夫豈真亡

祭妙高仁禪師文

孤鳳兩雛名著諸方我初識譽未識華光政和甲午還
自南荒夜宿衡嶽草屋路旁僕奴傳呼妙高大方連壁
而來驚喜失牀高誼照人笑語抵掌瀟湘平遠煙雨孤
芳舉以贈我不祕篋箱追繹陳迹云更幾霜去年中秋
宿師雲房爲留十日夜語琅琅曰我出吳游淮涉湘今
三十年倦鳥忘翔偶如慧曉懷思故鄉想見明越雲泉

蒼茫已遣阿湧先渡錢塘不見半年嶺谷想望計至驚
定淚落沾裳思歸之念夫豈其祥嗚呼師乎忠義激昂
高風逸韻仁肝義腸縉紳相志遠公支郎此生逆旅已
熟黃糧夢中吳楚寧能取將唯方廣譽躬至影堂如我
致辭而炷此香清淨法身敗橐膿囊光透毛孔不可掩
藏昔日非在今未嘗忘如水中乳莫逃鷲王則我與譽
何用歎傷

祭覺林山主文

惟靈簡易似放閒靜似懶以法爲林滴水爲限夜歸村
落投枕再鼾竈黔無煙童僕啼飯而兄直視爲一笑莞
然三十年事事成辦我愚且鄙少去故鄉豈不懷歸路
脩且長遂成永隔死生相忘念俱事師落髮游方如宿
逆旅各夢同牀聞訃一年乃奠靈几觸目悽慟語訖酸
鼻嗟乎人生有思有義薦此鉢飯淚墮如洗

祭幻住庵明師弟文

子少棄家從我游嬉三十一年如夢頃時於此夢境憂

患半之我竄萬里白骨重肉子臥一庵亦失雙目心知
餘年再見不復敢料來歸先館子廬即視摸索認聲驚
呼我亦念子形神已枯百不如人謂當壽考心期惻然
正爾難保如臨崖樹先自枯倒不見兩月果以訃聞既
通世契久同師門臨終之語骨湏我焚攜法兄祖疾馳
三日瓦燈晝昏寂然空室相視以慟薦此鉢食

祭鹿門燈禪師文

維皇宋建炎元年歲次丁未五月庚寅朔二十日特敎

復僧其謹以茗果之奠敢昭告于燈公禪師之靈明安
宗風續佛壽命幾絕而存至師大振芙蓉東去隨至磻
陽如道吾智而有石霜定惠既化遷住鹿門如青林虔
而繼新豐雖牧萬僧如數三四觀其規模寶覺是似重
和改元髮僧宮寺褫襪之師包羞惜死諂諛之極遂拜
黃冠師笑視之泚其面顏蘇嶺之下寶坊幻出何以致
之蓋其願力既孝其師又悌其兄有光叢林不負佛恩
凜然風神今成萬古薄奠在盤淚落無所

祭五祖自老文

古人尚友不短千載苟曰氣合何必面對崎嶇遠來僥倖爲會坐未歡然師不少待如人噬臍不及何悔掩淚莫陳意折心碎十方現前去來無礙師豈真亡覲露妙在

祭郭太尉文

公起徒步絲絢入侍遂斷國論危言讜議在妬忌中剛而有禮天子敬之愛等昆弟雖無知名民陰受賜如漢

子房如唐陸贄人衆勝天覺中妬忌公笑徑去道固如
是一斤不復而又早世姦邪色矜天下隕涕我初聞訃
中夜而喟公之精神與天終始宜終功名宜身富貴乃
歿瘴鄉又寓旅邸人之竒禍至此極矣唯德是輔殆虛
語耳天定勝人果不容僞妬忌伎窮反自相噬邪正日
分曉如涇渭今餘十年歸骨萬里我昔觀光混迹都市
游公卿間如梁寶誌公每延禮忘其勢位我亦徑造必
至臥內兵衛如雲不敢呵止愛憎相奪有萬贊毀坐嘗

厚善囚我棘寺幾失頭顱終禦魑魅敢期白髮奠于湘
水世相新奇習爲巧士教訓諂鉤取祿利貌雖光澤
行可愧恥聞公之風面熱頰泚吾聞陰德榮享必至不
身嘗之當在其子格言不欺果見偉器沐浴道德冠冕
仁義定世其家行矣是似則公之生亦何嘗死

祭朱承議文

吾聞明珠白璧石韜水藏山川草木被其容光臨川之
民共此盱上如湘老龐道德光華照映兩邦吾儕微蹤

雲浮四方眷此不去是亦故鄉歎公杖履人羣軒昂忠
信豈弟易親難忘忽厭夢境高蹈八荒公有賢子如麟
鳳凰王室柱石吾法垣墻終大公後公豈真亡想聞此
語抵掌脫冠未忘世禮聊薦積香

祭許先之文

維公於國盡忠於家盡孝豈特天資亦學之効德富才
高川增嶽秀薦登清華出縉紳右用舍進退有命有義
一斥而終料豈及此聖恩不貲五日而至公獨不沾陽

城陸贄嗟余蠢鄙於物多迂幸不終窮有公知遇屋歸
山丘舟逃夜壑寓詞一觴心折涕落

祭趙君文

惟靈忠信恭敬耀於西州不爲無聞年餘七十笑傲林
丘不爲無壽生有令子派佛祖流不爲無慶有一於此
足以忘憂而況三者兼有之耶茲山弗嗣麋鹿所遊十
年之間百廢俱修凡以令子德義之優故也余聞之鳥
巢南枝狐死首丘彼亦何知能思厥由矧輕勢急道超

然特立者乃肯爲之羞乎嗚呼訃來萬里物故越秋等
視閻浮譬如一漚公之云亡非去非留薄奠告焉世禮
則由雖神竈竟無不知也尚能爲之歆不

瑄上人祭母文

我生頑鈍雀息鳩視不歸庸人亦幸而已矧墮三寶高
出塵累儼臨人天福田于世坐推其因何以至是皆吾
母慈念極心碎我昔東游志亦勇銳訪道名山酬此恩
爾身雖四方心挂漳水豈不懷歸料豈及此三月甲寅

訃來千里棄杖南嶽露行草止天降荼毒乃不及已呼
天泣血奪我母氏今何能爲中局亂矣昔每歸省迎門
笑喜堂今聞然瓦燈塵几慈和粹溫竟作川逝撫柩長
號淚迸如洗杯露鑪香區區世禮天地有終此恨無既

祭通判夫人文代

竊聞漢王霸之室有智識而柔懿然子孝而不學夫雖
賢而弗仕又聞唐王珪之母閱房杜而知子及珪身登
三事則其母又已即世唯夫人之高風特有異於是二

者矣夫有霸之賢而為熙豐之名臣子有珪之材而名冠縉
紳壽閱諸孫而視聽敏捷孫能酌古而心醉六經蓋功名
之念如雲之必雨富貴之盛如川之方增寔清規之所訓
祭景慕之遐想懿德必光於史牒計夫人雖死其何憾乎

祭文七首代

我聞如來世尊將涅槃自披其胃紫磨黃金卍字之相
出言告大衆曰汝等各各瞻仰今足無生後悔及已掩
棺迦葉後至又出雙趺以示眷憐嗚呼如來世尊正傳

法嗣覆蔭此邦三十餘年凡在道俗上與清衆下與奴
隸若親若疎若小若大皆受餘庇今以入塔攀戀無已
精明之溫豈弟之容不可復見柔軟之音慈誨之語不
可復聞宗乘微論差別之義不可復解言念至此意折
心摧嗚呼禪師葬靈骨於九原想音容於萬古雪雲方
慘兮悲風飄颻松聲蕭瑟兮哀聲連朝陳微誠兮以薦
薄冀望慈雲兮其不可招嗚呼哀哉

我來淮山寒暑九遷傾誠於師遂爾忘年比隣追隨合

并周旋每一會語莫不懽然法屬之故無時造膝師嘗
顧我笑指坐席曰終當主我此文室謂師爲戲不敢怒
嗔今日何日果繼後塵血指汗顏不善斧斤而師旁觀
教之諄諄今既逝矣夫復何云先德遺訓何敢不遵法
侶現前聊薦溪蘋禮雖不腆情無鮮陳因法相逢以法
爲親非子則姪繩繩誥誥傾困倒廩不祕珠珍煖其孤
寒賞其賤貧自師退居其德日新諸方竒衲川翰雲屯
大法將頽謂必中興不見一夕遂以訃聞如方欲渡遂

迷要津中夜起喟棄牀失聲慈和粹温永失依怙香羞
在筵淚落無所

東山真子白雲的孫迅機妙辯褒然逸羣黃河流天太
山吐雲無有窮極莫知津垠師罷住持其道益尊酣歌
自樂晝常掩門世不得見言豈得聞檻撰積香鑪焚室
熏今既非去昔亦豈存此意昭然即曰全真道大德高
名聞諸方禪林耆艾覺苑鳳凰三十餘年化行此邦我
輩晚生幸登覺場聞金石誨熏知見香譬如珠玉山韜

水藏而其草木亦被餘光今既云逝撫心悼傷嗚呼師
乎巍巍堂堂遂成千古天豈真亡念昔侍坐恭聞誨言
辭親出家是大因緣本出生死期離蓋纏求師之難自
古則然如芥子針如鸞膠絃我等何輩萃此法筵如海
之大而會百川教誨成就長養撫憐如物發生雨露無
偏又霜雪之使其氣全恩有四種報効當先百未一施
師我棄捐師之道德如月在天譽月之明何以加焉恭
陳薄奠儼如在前情斷志訖淚落九泉

天姿曠達純素任真妙年出蜀汎愛親仁淹通宗教廣
見精聞我亦何幸早獲相親義爲朋友法爲弟昆於師
父子兩爲比隣周旋之久三十餘年懷我宗伯宗門鳳
麟不幸早逝殞此偉人謂師英氣可續芳塵今又已矣
撫淚沾巾嗚呼禪師夢幻視身而視生死如夜與晨十
方現前孰亡孰存我獨何爲浪自酸辛無忘世禮薄奠
聊陳

祭老黃龍謚號文代

崇寧四年四月某日住山某敢昭告于南禪師之塔竊
聞巢由穡者夷齊餓夫初若無求於一時終必有稱於
百世觀其措慮深遠蓋亦維持化風故知德澤之在民
是乃聲名之不捨又況荷擔大法提攜四生者乎恭惟
禪師家于此山名落天下起臨濟於將仆傳少室於無
窮厥集大成有光先覺乃者明天子沛流殊恩大昭懿
德特旌普覺之號用勵後學之徒仰惟覺靈祇此榮福
嗚呼春葩華於萬物而不自以爲功日昭明於四方而

不知以爲德凡所以歌詠和氣褒贊高明者皆天下之至情然則禪師於此豈曰不然耶

崇仁知縣赦後祭神文

唯三代之訓夏至日恭祭地祇斯古先哲王之懿德禮也而歷世堙沒不嗣今天子力舉而行之致禮既畢竒祥薦興歡聲和氣充塞天地猶以名山大川廟貌所在有功血食於民者未克躬至則以守令使告行吏其敢不肅虔哉謹用某日特具牲醑以奠于祠下神之聽之

祇此榮福

祈雨文


仍歲饉凶民之艱食亦以衆矣而菜色喘沫者猶並首
以望有秋如痿者之不忘起也春夏之交風雨時若方
將奮躍似有生意而比日毒暑並熾四無雲陰車鵝夜
鳴田龜晝坼饉凶之憂恐在朝夕傳曰亨牛而不鹹敗
所成矣又曰行百里者半九十爲不克終豈神之賜昌
其始而終奪之邪吏以不職上天降罰吏躬任之民其

何辜而神亦坐視其病哉謹率丞佐羣趨並走致恭于
祠下雀息以俟休咎神其哀憐之

謝雨文

比日以來民以不時實雨望天焦勞蓋飢饉之餘情易
驚擾如禽傷弦念痛於曲木如稚驚雷失聲於破釜是
用率丞佐上瀆神聰香火未收雲氣已布連日繼夕霖
雨霑足嗚呼雖父兄之所哀憐其必從何以迨比舞翠
浪於山原兆黃雲於困廩歲登訟簡民樂吏閒荷神之

賜孰大於此式莫昭告豈不休哉



石門文字禪卷三十